

152188 - ইদত পালনকারী নারী তার বাসার সাথে লাগোয়া ভাইয়ের বাসায় মেহমানদেরকে রিসিভ করতে যাওয়া

প্রশ্ন

আমার স্বামী মারা গেছেন। মুফতিদের মতামত অনুযায়ী আমি আমার পরিবারের বাসায় ইদত পালন করছি। আমাকে দেখতে অনেক মানুষ আসায় আমার মা বিরক্ত হন। আমার ভাইয়েরা আমার পিতার বাসার পাশেই থাকেন। আমার বাবার বাসার দেয়াল ও ভাইয়ের বাসার দেয়াল একটাই। আমার মেহমানদেরকে রিসিভ করার জন্য আমি আমার ভাইয়ের বাসায় যাওয়া কি জায়েয হবে; যাতে করে আমার মা বিরক্ত না হন। এরপর মেহমানরা চলে যাওয়ার সাথে সাথেই আমি আমার বাবার বাসায় ফিরে আসব। দেয়াল একটাই। আমি হিজায় ছাড়াই যেতে পারি; যেহেতু তার বাসা আমার বাবার সাথে লাগানো। এটা কি জায়েয হবে?

প্রিয় উত্তর

স্বামী-মৃত্যুর ইদত পালনকারী নারী যে কোন প্রয়োজনে দিনের বেলায় ঘর থেকে বের হতে পারেন; তবে রাতের বেলায় জরুরী কিছু ছাড়া বের হবেন না।

ইবনে কুদামা (রহঃ) “আল-মুগনী” গ্রন্থে (৮/১৩০) বলেন: “ইদত পালনকারী নারী নিজ প্রয়োজনে দিনের বেলায় বের হতে পারেন; হোক না সেই নারী তালাকপ্রাপ্তা কিংবা বিধবা। যেহেতু জাবের (রাঃ) বলেন: আমার খালার তিন তালাক হয়ে গেল। তখন তিনি তার খেজুর গাছ কাটার জন্য বের হলে এক লোকের সাথে সাক্ষাৎ হলো। সেই লোক তাকে নিষেধ করলেন। তখন তিনি নবী সাল্লাল্লাহু আলাইহি ওয়া সাল্লামের কাছে বিষয়টি উল্লেখ করলেন। তিনি বলেন: আপনি বের হন এবং আপনার খেজুর গাছ কাটুন। আশা করি আপনি সেটা থেকে দান করবেন কিংবা কল্যাণকর কিছু করবেন।”[সুনানে নাসাঈ, সুনানে আবু দাউদ]

মুজাহিদ বর্ণনা করেন, তিনি বলেন: “উহুদের যুদ্ধের দিন কিছু লোক শহীদ হলেন। তখন তাদের স্ত্রীরা রাসূল সাল্লাল্লাহু আলাইহি ওয়া সাল্লামের কাছে এসে বলল: ইয়া রাসূলুল্লাহ! আমরা রাতে একাকীত্ব অনুভব করি। আমরা কি সবাই একজনের ঘরে রাত্রি যাপন করতে পারি? সকাল হলে অবিলম্বে আমরা যার যার বাসায় চলে যাব। তখন রাসূল সাল্লাল্লাহু আলাইহি ওয়া সাল্লাম বললেন: আপনারা একজনের বাসায় সবাই গল্প করুন। যখন ঘুমাতে চাইবেন তখন প্রত্যেকে নিজের বাসায় চলে যাবেন।”

ইদত পালনকারী নারী তার বাসা ছাড়া অন্যত্র রাত্রি যাপন করবেন না। জরুরী পরিস্থিতি ছাড়া রাতের বেলায় বের হবেন না। যেহেতু রাতে ফাসাদ ঘটান সম্ভাবনাময় সময়; দিন এর বিপরীত। যেহেতু দিনের বেলা নিজের প্রয়োজন ও জীবিকা পূরণ এবং প্রয়োজনীয় কিছু ক্রয় করার সময়।[সমাণ্ড]

স্থায়ী কমিটির ফতোয়াতে (২০/৪৪০) এসেছে: “মূল বিধান হলো: নারী তার স্বামীর বাসায় রাত্রি যাপন করবে; যে বাসায় থাকা অবস্থায় তার স্বামী মারা গেছে। কোন প্রয়োজন বা জরুরী কিছু ছাড়া সে বাসা থেকে বের হবে না; যেমন অসুস্থতার কারণে

হাসপাতালে যাওয়া, বাজার থেকে রুটি বা এ জাতীয় কিছু কেনা; যদি তাকে এগুলো কিনে দেয়ার কেউ না থাকে।”[সমাপ্ত]

উপরোক্ত আলোচনার প্রেক্ষিতে, আপনার জন্য দিনের বেলায় আপনার ভাইয়ের বাসায় যাওয়া জায়েয হবে; যাতে করে আপনার সাথে যারা দেখা করতে আসে তাদের সাথে আপনি সাক্ষাত করতে পারেন; যদি এই ধরনের সাক্ষাতে আপনার মা বিরক্ত হন।

ইদত পালনকারী নারী কোন কোন বিষয় থেকে বিরত থাকবেন সেটি জানতে [10670](#) নং প্রশ্নোত্তরটি পড়ুন।

আল্লাহই সর্বজ্ঞ।